



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

KOMUNIKADU IMPRENSA
Semináriu Rejionál Baucau
06 Feveireu 2017

JSMP realiza semináriu Rejionál kona-ba Knaar Parlamentu Nasionál no Autór Judisiáriu iha Sistema Justisa Formál Timor-Leste

Iha 03 Feveireu 2017, JSMP realiza semináriu rejionál iha Munisípiu Baucau kona-ba “*Knaar Parlamentu Nasionál no Autór Judisiáriu iha Sistema Justisa Formál Timor-Leste*”. Partisipantes iha semináriu ne’e mai hosi xéfe suku sira, delegadu feto, konsellu no lia-na’in ne’ebé kompostu hosi representante suku 16, hosi Postu Administrativu Vemasse, Munisípiu Baucau, Postu Administrativu Lautem, Munisípiu Lautem no Postu Administrativu Ossu, Munisípiu Viqueque. Totál partisipante ema na’in 25 kompostu hosi feto 7 no mane na’in 18.

Oradór sira iha semináriu ne’e mai hosi representante Tribunál Baucau no sosiedade sivíl. Oradór hosi Tribunál representa hosi Meritisímu Juís, Dr. Afonso Carmona, Juiz Administrador Tribunál Baucau ne’ebé ko’alia kona-ba Kna’ar Tribunál iha Sistema Justisa Formál Timor-Leste nian. Enkuantu, oradór hosi sosiedade sivíl, representa hosi Diretór Ezekutivu JSMP, Luis de Oliveira Sampaio ne’ebé ko’alia kona-ba rezultadu sira monitorizasaun JSMP nian iha Parlamentu no Tribunál.

Semináriu ne’e ho objetivu atu organiza no fasilita kontaktu direta entre comunidade sira ne’ebé hetan ona treinamentu kona-ba demokrasia, knaar órgaun soberanu, partisipasaun públiku iha prosesu halo lei no asesu ba justisa formál ho representante sira hosi órgaun soberanu nian, partikularmente Parlamentu Nasionál no Tribunál. Nune’e comunidade sira bele hakle’an tan sira nia koñesimentu no mós bele hato’o sira nia hanoin, krítika, dúvida no preokupasaun relasiona ho knaar órgaun soberanu sira nian. Infelizmente, representante hosi Parlamentu Nasionál la marka prezensa tanba iha agenda importante seluk ne’ebé presiza hala’o.

Kestaun ne’ebé partisipante sira foti mak kona-ba prosedimentu ba prosesu kapturasaun ba arguidu sira iha kazu krimínál, detensaun ba arguidu la iha karta mandadu ruma, prosedimentu keixa ba kazu krimi no sivíl sira inklui mós kestaun kona-ba aplikasaun lei Portugál, Indonesia no UNTAET nian durante ne’e.

Partisipante sira mós husu kona-ba kazu rai ba ema ne’ebé hela iha ema seluk nia rai no reklama nu’udar na’in ba rai ne’e no sé mak iha direitu ba rai ne’e tuir tribunál. Prosesu alterasaun ba Lei Pensaun Mensál Vitalísia ne’ebé Parlamentu Nasionál halo la fó vantazen ba estadu atu hadi’a povu nia moris no nia implikasaun ba estadu atu bele hadi’a povu sira nia vida moris.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

luis@jsmp.minihub.org

Facebook: www.facebook.com/timorleste.jsmp

Twitter: @JSMPtl

Aleinde asuntu sira seluk mós mak hanesan kestaun sira ne'ebé partisipante sira foti mak hanesan asuntu revogasaun ba Lei Nú. 3/2009 hosi lei nú.9/2016 kona-ba lei suku nian ne'ebé la fó vantazen ba estruktura suku no implika diskontentimentu hosi suku sira tamba saláriu ba delegadu no delegada sira la iha no sura de'it xeña prezensa. Lei importante sira seluk ne'ebé pendentí hela iha Parlamentu husu atu JSMP bele hato'ó ba Parlamentu no governu hodi aselera prosesu diskusaun ba lei sira ne'e, liu-liu esbosu lei rejime titularidade nain ba bens imovel.

Relasiona ho pergunta hirak ne'e, oradór hosi Tribunál nian esprika katak lala'ok no prosedimentu legál sira ne'ebé vigora iha Timor-Leste no lei sira seluk ne'ebé Timor-Leste sei adopta hodi aplika bainhira seidauk iha lei foun atu revoga lei Indonezia nian hirak ne'e.

Kona-ba kestaun pensaun vitalísia, desizaun polítika deputadu sira iha Parlamentu Nasionál nia, JSMP mós lamenta ho desizaun ne'e no enkoraja povu atu participa ativu iha prosesu kontruksaun estadu no espera lezislatura oin mai bele hadia diak liutan lei refere tuir kondisaun real Timor-Leste nian.

Pakote Lei ba Rai sei prosesu diskusaun nian laran, tanba ne'e iha tempu badak Parlamentu Nasionál sei aprova. Tuir komprimisiu ne'ebé sira fó sai katak antes sira nia mandatu remata sira sei finaliza tia lei importante hirak ne'e. Aleinde ne'e ho mós lei anti korrupsaun ne'ebé mós sai prioridade no agora dadaun sei pendentí hela iha Parlamentu Nasionál.

JSMP agradese tebes ho prezensa partisipante no oradór sira nian, partikularmente prezensa Tribunál nian iha semináriu rejionál ne'e.

Partisipante sira rekomenda atu programa hanesan bele hala'ó iha fatin sira seluk, liu-liu komunidade sira ne'ebé la dun hetan asesu ba informasaun.

JSMP hein katak ho fórum sira hanesan ne'e sei fornese referensia útil no real ba meritisímu sira atu posivel hodi inkorpora realidade no nesiedade komunidade nian iha prosesu justisa formál Timor-Leste nian ne'ebé iha faze kontrusaun hela.

Tuir planu, programa ne'ebé hanesan sei hala'ó fali iha Munisípiu Dili, iha Fevereiru no Marsu 2017 nia laran.

Programa ne'e realiza tanba hetan apoiu hosi Fundu Governu Australia liuhosi programa AusAid ba período tinan 2016-2017.

Atu hetan informasaun kle'an liu tan favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPtl